

Date – 14/02/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Aizawl International Half Marathon chu tukin khan hlawhtling taka tlan a ni a, nen mi 3000 bawr vel an tlan a ni.
2. Ni 4 awh LESDE KUT Aizawl Lammual a neihah hna zawng mi 28 in hna an hmu.
3. Hmangaihte Ni Valentines Day vawiin khan Aizawlah a mamawh apiang te hman tura a thlawna thisen pe zat chu mi 200 an chuang.
4. Prime Minister Narendra Modia chuan vawiin khan Assam-a Dibrugarh district-a Moran Bypass National Highway -ah Emergency Landing Facility a hawng.

<><><>

AIHM

Mizoram Sawrkar Sports & Youth Services Department leh Innovations India tangkawpin "Connecting India, Developing Mizoram, Empowering Sports" tih thupui hmanga an buatsaih Aizawl International Half Marathon chu tukin khan hlawhtling taka tlan a ni a, khawvel hmun hrang hrang atanga Aizawla lo kal bakah tualchhung mi te nen mi 3000 bawr vel an tlan a ni.

Aizawl International Half Marathon hi Rajiv Gandhi Stadium, Mualpui atangin an tlan tan a, Silaimualah kualin a hmun ngaiah bawk an kir a ni. Marathon vailiamtu Larsap Gen Retd VK Singh chuan, Marathon buatsaih tuten ngaihtuahna an seng thiam a, boruak nuam tak hnuaiah inelna neih a ni a ti a, hun lo kal zel turah pawh tun aia nasa zawk hian khawvel hmun hrana mite a la hip khawm ngei ang tiin a sawi.

(Byte : Governor)

AIHM curator Captain Rahul Bali chuan Akashvani Aizawl zawhna chhangin, Aizawl International Half Marathon hi tlang rama tlan (hill marathon) a nih avangin marathon dangte aiin a danglam bik a ti a. Khawvel hmun hrang hrang atangin mi 3000 bawr an tel thu leh nikuma Aizawl International Half Marathon vawi 1-naah khan mi 1,500 vel an tel a; tunah chuan a hma aiin a lian tawh zawk hle a, Kenya, Ethiopia, Bahrain, United Kingdom leh France ram atangte pawhin marathon-a tel tur an rawn kal a, hei hian Mizoram chu khawvel marathon lian huangah a hruai lut a ni, a ti.

(BYTE)

Mizoram Sports Minister Pu Lalnghinglova Hmar pawhin a hmasa aiin kuminah Marathon chuan ngaihhlut a hlawh zawk tih a sawi a, India mai bakah ram hran hran atangin infiammi an lo kal thei chu lawmawm a tih thu sawiin, Mizoram chu khawvel huap inelna thleng tur pawhin a inpeih tih a entir niin a sawi bawk.

Mipa inelna KM 21-ah Kenya tlangval Kemboi Kevin Kiprono chu a chak ber a, ani hian ani hian darkar khat leh second ruk chhungin a tlan thleng a ni. Hmeichhia ah Renu Singh (Uttar Pradesh chu pakhatna a ni a, darkar 1 leh min 21 leh sec 22 ah a tlan thleng a, Open Race km 10 ah **Hmeichhia ah pakhatna a ni a**, Mipa ah Arif Ali chu pakhatna a ni.

<><><>

LESDE KUT

Labour, Employment, Skill Development & Entrepreneurship LESDE KUT ni 4 awh chu vawiin khan Aizawl Lammual ah khar a ni, KUT neih chhung hian hna zawng mi 28 in hna an hmu a ni.

LESDE Kût 2026 kharna hunah hian LESDE Minister Pu Lalnghinglova Hmar chuan thusawiin Mizoram chuan entrepreneurship leh thiamthil zir kawngah hma sawn mahse thil tha zawk leh danglam zawk ngaihtuah zel a tul a ti a. LESDE Kut chu kuthnathawkte, thiamthil nei te leh hna zawng mek te puala buatsaih a nih thu a sawi a. LESDE department inhmelhriattirna leh sorkar hnuaiia hamthatna hrang hrang dawn theih te pholanna hun a ni bawk a ti.

(BYTE)

Kan corr report lo ngaithla chhonzawm ang,

LESDE Kût hi Mizoram Sawrkar hmalakna niin, LESDE Department leh a kaihnawih board leh institution hnuaiia service, programme leh hlawhtlinnate phochhuah a ni a. Thalai, MSME, entrepreneur, hna zawng mek, hnathawktu leh anmahni kaihruai theitu turte chu a kaihnawih peng hrang hrangte nen thlunzawmin, hna, thiamthil leh hamthatna dangte hre chiang turin hun tha a siam sak a ni. Made in India leh Atmanirbhar Bharat chawilarna niin, state leh regional level trade fair kaltlangin thil siam hrang hrang phochhuah a ni a. Micro and Small Enterprises (MSEs) nen tangkawpin Mizoram leh North Eastern Region-a entrepreneur-te Sawrkar laipui hnuaiia Ministry leh Mizoram Sawrkar Department hrang hrangte nen a thlunzawm bawk a ni.

LEDSE kutah hian Stall 162 hawn a ni a, heng zinga stall 11 hi Mizoram pawn atanga rawn nghak an ni Nimin thlenga chhinchhiah danin Kutah hian kuthnathawkte leh hna zawng mek mi 234 sorkar scheme hrang hrang hnuaiia an inziaklut a, mi 28 in hna an hmu a ni. Kharna inkhawmah hian District Skill & Entrepreneurship Award 2025-2026 pek a ni.

<><><>

UNION MINISTER VISIT

Union Minister of State Pu George Kurian, Ministry of Minority Affairs changtu chuan vawiin khan Siaha a tlawh a, BJP Siaha District Office Building sakna tur lungphum a phum.

Union Minister chuan BJP District: Office Building sakna tur ah hian sum lamah buaina a awm dawn lova, DPR ang thlapin sak ani dawn a ti a, BJP Siaha District mamawh ang zelin sak a ni bawh ang, a ti.

BJP Siaha District: Office Building tur hi chhawng 6 a sak tur ani a, kum 1 chhunga sak zawh tur a ni.

Lung phum zawh hian CEM Bungalow ah MADC hotute leh BJP Siaha District hruaitu te nen inkawmin hemi hnu hian Delhi ah a let nghal a ni.

Union Minister hi BJP Mizoram Pradesh President Pu Dr. K. Beichhua, MLA leh State Vice President Pu Lalduhawma ten Aizawl atangin an tawiawm a ni.

<><><>

CS

Chief Secretary Pu Khilli Ram Meena an Maharashtra Chief Secretary Pu Rajesh Aggarwal chu nimin khan Mumbai-a a pisaah tlawhin, Navi Mumbai Vashi-a sak tur Mizoram House chungchang a sawipui.

Kum 2008 khan Mumbai a City and Industrial Development Corporation (CIDCO) chuan Vashi, Mumbai-ah hian ram, SQM 1983.48 chu Mizoram State Guest House cum Emporium atan hmun a lo ruahman tawh a. Nimahsela a sak hna hi, CIDCO leh Construction Agency te kara rokhawlhna eng eng emaw avangin eng emaw chen tikhawtlai a ni ta a ni.

An inkawmnaah hian Pu Khilli ram Meena chuan Maharashtra CS hnenah hian sak tan hun chu kumin March ni 31 thlenga hrethiam hram tur leh sak hna khawtlai avanga chawi tur chu ngaihtuah thatsak turin a ngen a. Pu Rajesh Aggarwal chuan hemi thuah vek hian CIDCO hotute hi a be nghal a ni.

Pu Khilli Ram Meena chuan House sakna hmun tur hi a tlawh nghal a ni.

<><><>

VDAY BLOOD DONATION

Hmangaihte Ni Valentines Day vawiin khan Aizawlah a mamawh apiang te hman tura a thlawna thisen pe zat chu mi 200 an chuang.

Association for Voluntary Blood Donation (AVBD), MSACS, NHM, KFC leh Civil Hospital, Aizawl-a Model Blood Bank te tangho chuan Dawrpui Multipurpose Hallah Valentine's Day Blood Donation Camp an buatsaih a, South Tuipui Bialtu MLA Pu Jeje Lalpekhlua chuan he hun hi a hmanpui a ni.

Thusawiin Pu Jeje Lalpekhlua chuan Midangte tana thisen pe a midangte tana luangchhuak thei nih chu thil lawmawm tak a nih thu a sawi a. Mizoram pawn hmun hrang hrangah awmin mi chi hrang hrang a chenpui thin thu leh chuta Mizo nih nawmna chu tlawmngaihna a nih thu a sawi a. Vawiina tlawmngaia thisen pe tura

kalkhawm an tam zia a hmuhin Mizo nih chu nuam a tih zia leh vannei a intih zia a sawi a. Mi tam takin vawi tam tak thisen an pek theih chhan chu an hrisel vang leh an taksa an uluk vang a nih thu a sawi a. Thalaite chu hriselna vawng tha a, nun uluk turin a chah a ni.

(BYTE)

He hunah hian Civil Hospital, Aizawl Blood Bank-a Sr. Medical Superintendent Dr. Lalchhuankimi pawhin thu sawiin thisen pek tangkaizia leh nghakhlel tu an tam zia hriat a pawimawh a ti a. Thisen unit khat pawh a hlu tih sawiin unit khat, bag khat atangin component 4 ah chhuah a nih thu leh tangkai takin damlote mamawh dan hrang hrang milin siam thin a ni a ti a. Bag li bag nga ah siamin a mamawhtu ten an mamawh na chat chatah pek a ni a, a tangkai hle tih a sawi a ni. Thisen pek sa a awm chuan rikrum thilah a tangkai hle tih a sawi bawk a ni.

<><><>

SMART METRE PAKHWADA

Sorkar laipui Ministry of Power in kumin February ni 9 atanga ni 23 chhunga Mizoram hmun hrang hrangah “Smart Meter Pakhwada” hman tur a tih angin Champhai District-a Power & Electricity Department hmalaknain Champhai District-ah nimin leh vawiin khan hun hman a ni.

Nimin khan Champhai District a khaw pathum, Chawngtui ‘E’, Hnahlan leh Tualchengah te hun hman a niin vawiin khan Champhai Bazarpuiah smart metre chungchang mipui zirtirna an kalpui leh a ni. Smart Meter Pakhwada-ah hian mipuiin an hriat tur tul: Smart Meter chungchang te, awlsam zawka electric bill pekna PEDM Consumers App download a, hman tangkai tura zirtirna te an nei a ni.

Smart Metering leh Prepaid System te hi hman a la nih dawn avangin Champhai District huam chhunga chhungkua zawng zawngte P&E Department App ‘PEDM Consumer’ App lo download vek a, a hman dan lo zir lawk vek turin P&E Department chuan a ngen a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

EMERGENCY LANDING FACILITY

Prime Minister Narendra Modia chuan vawiin khan Assam-a Dibrugarh district-a Moran Bypass National Highway -ah Emergency Landing Facility a hawng. He hunah hian fighter jet, transport aircraft, leh helicopter te pholan an ni a. Heng izngah hian Air Force Sukhoi Su-30MKI, Rafale, AN-32, Tejas leh Advanced Light Helicopter te an tel. Emergency Landing Facility hi North East-a a hmasa ber a ni a. Rikrum thilah sipai thlawhna leh civil thlawhna tum theihna tura siam a ni.



PM MODI IN GUWAHATI.

Vawiin vek khan Prime Minister Narendra Modia hian Guwahati atangin hmasawna hna cheng vaibelchhe 5450 hu a hawng baw k a. Vawiina a hawn zingah hian Brahmaputra lui kan a Guwahati leh North Guwahati inkalpawhna tur Kumar Bhaskar Varma Setu lei a tel a. He lei hi cheng vaibelchhe 3000 chuang senga sak a ni a. Pu Modia hian Kamrup district-a Amingaon-ah IIM Guwahati temporary campus leh National Data Centre for North Eastern Region te chu internet kaltlangin a hawng baw k a ni. Pu Modi-a hian electric bus 225 chu PM-eBus Sewa Scheme kaltlangin a a vailiam baw k ani.



UNION CABINET

Union Cabinet nimina thukhawm chuan Urban Challenge Fund atan cheng vaibelchhe nuai khat a pawm a. Hei bakah hian Startup Ecosystem thang zel ti chak leh zual turin Union cabinet Startup India Fund of Funds 2.0 din a remti a. He fund atan hian cheng vaibelchhe sing khat ruahman a ni.

